

# SAN PABLO CARTA EFESO CHJAMBTEWE'SH JÏI

## Efeso chjambtewe'shtyi fi'jni

**1** <sup>1</sup> Andya' Jesucristo jycaajnis Pablo yaasetj, tyā'wēte selpiwa'jsa Dyus nviitnisa. Tyāa pa'ga Dyus luuch Efeso chjambtewe'sh jïi naa carta's fi'jrra cajaststju, Cristo Jesusa's nwēese'jna fi'nzesawe'shtyi wechana. <sup>2</sup> I'cue'shtyi' Dyusa' pu'chjina vite' cue'shtyi jype'jsa Jesucristova, tyāa pa'ga Dyus yacjrráa mfi'nzewe.

## Cristo jïi yuupa'ga Dyus iiméj wala pu'chni

<sup>3</sup> Cue'shtyi jype'jsa Jesucristo Tata's wala yuj wechawa'lj ji'ptja'w. Cue'sha' Cristo yacj utyaapa'ga quīj yujva peejymée jyucac tyajy dyi'pte jypumbamée fi'nzewa'ja's nviyt cielutewe'sh yuuwa'ja's. <sup>4</sup> Tyāasa íc naa quiwe meetey Dyusa' cue'shtyi' tyjityj, quīj pcal yujva ji'pjmée Cristo na'wēysa yuucajn. <sup>5</sup> Cue'sha' quījite yujva seelpimeesateva Dyusa' naasáa peeygājrra yuurráac Jesucristo nwe'wete', cue'sh tyajy luuch yuuwa'ja's dyiicjēy vitrra nviyt. <sup>6</sup> Tyā'wē peeygāapa'ga Dyusa's bagachteva wechana yuurráa tuutje'jwa'lj ji'ptja'w, tyajy Nchi'c Jesucristo nwe'wepa'ga. <sup>7</sup> Tyāa Jesucristoc cue'shtyi' nwe'we tyajy eeju cue'sh pcaltyi jyuca peltunāyrra. Nava Dyusa' cue'shtyi wala peeygājrra yuurráac tyā'wē yuuwa'ja's vit. <sup>8</sup> Tyā'wēy Dyusa' cue'shtyi' quījite yujva peejymée jyuca āate caajiyu'cj. <sup>9</sup> Nyafiitey quim yujva jiyunimeete ma'wē yuuwa'ja's ne' vitrra ji'pju' tyā'snac cue'shtyi caajiyu'lj. <sup>10</sup> Tyāa yu' na'wēc yu': cielute ūssa vite' naa quiwetewe'sh yā'jrra jyuca Cristorrarrá's nwēese'ljwa'lja', atsa' tyā'wē yūuwa'lj en ājte', jyuca cytey yuuna.

<sup>11</sup> Dyus jïi yu'sa' jyuca jypa'gawa'ja's Dyusa' nyafiitey ne' pjeu'jrra nviyt Cristo nwe'wenisawe'sh jïi. Naa pa'ga Cristo nwe'wenisa' jypa'gawa'jsatja'w Dyus pjeu'jrra nviitni yu' jyuca. <sup>12</sup> Cue'sh tyā'wē yūuwa'ja'scu Dyusa' pjeu'jrra nviyt, Cristo's nyafyte neewe'wesa cue'sh

tyā'wē Dyus ew yūupa'ga wechaacajn. <sup>13</sup>Atsa' i'cue'shva tyā'wēy Dyus yuwe ewte nviitwa'jsa's wēse'jrra Cristo yacj fi'nzeyā' utyaatspcachja', Dyus ūsni tyajy Espiritu' i'cue'sh ūuste cǰēec, Dyus cuseju peena yu' tyutecajmen. <sup>14</sup>Atsa' Dyus Espiritu's ūuste ji'pjsa' nmej ente' tyajy nasaty jyucate nwe'wena jyā'jniū' Dyus jīi yu'sa' quījnava jyuca jypa'gawa'jsarra tyā'wē tyajy Espiritu's ji'pjsa ya'yuuna. Tyāa pa'ga Dyus tyacue wala ew yūusa's wechawa'ja'.

### Dyus yacj jweeírráa ew fi'nzewa'ja's caajiyu'cjan pēyni

<sup>15</sup>Tyāa pa'gatj andya' tyā'wē i'cue'sha' Cristo Jesus yacj jypumbameety fi'nze', sa' Dyus luuch jyucaysawe'shtyi peeygāja'ty jīni's jiyurra', <sup>16</sup>bagachteva Dyus yacj puuty we'wena wechana nes yu'. <sup>17</sup>Sa' cue'shtyi nwe'wesa Jesucristo Tata cielutewe'sha's pēyi'tj, tyāa yacj jweeírráa ew fi'nzewa'ja's caajiyu'cjan, <sup>18</sup>cyaj i'cue'shtyi quījya' nwe'werrava ew caajiyu'juna. Sa' cielute Dyus jī's quījnava jyuca jypa'gawa'lj ji'ptja'w tyā' seena' yuj wala zhichcuesa' tyā'snava jiyune'cue. <sup>19</sup>Sa' Dyus ājanisa cue'sh ūusty yu'ptjejsa' seena' yuj walasa' tyā'snava jiyune'cue. <sup>20</sup>Dyusa' tyāa ājanisa yacj írráac Cristo's uunijūva qui' ityi vitrra cielute tyajy pucate caycachi'j. <sup>21</sup>Sa' Cristo's cielute tyajy pucate caycachi'jrrac naa quiwete vite' cielute maa maateva jytjaacue walasa vitrra jycaajwa'ja's ūs, naa ente ma'c yuu meerra' vite ente ma'c yuu nava maateva Cristorraráa jytjaacue walasa yuucajn. <sup>22</sup>Dyusa' tyā'wē yūurrac quījquījva Cristorraráa's nwēese'jwa'ja's vitrra tyajy luuch yuutyi's Cristo yacj ij fi'nzewa'jsa vit, tyāawe'sh yuurráa maateva puutejca wendynisa tyajy jype'jni yuucajn. <sup>23</sup>Tyāa pa'ga Cristo jype'jnisa' tyāa yacj teehrráa yuuna pa'jrra, tyāa na'wēysa írráata', quīj yujva jwee yu' peejymesa.

### Dyus peeygāapa'ga yuurráa nwe'wenisa

**2** <sup>1</sup>Dyusa' Cristo'sva ma'wēga ityi vit, tyā'wēycu i'cue'shtyiva ityi vit. Tyā'wēme', nyafīia' i'cue'sha' pcalpa'ga Dyus dyi'pte uuní na'wē yā'ji'cue ūs yu'. <sup>2</sup>Tyāasai'cue tyagachtey yu' echtǰē'j naa quiwete jycaajni yuurrá's nwēese'jna ūsu'. Dyusa's nwēese'jya' wa'lsa yuutyi's echtǰē'ja' jweeírráac cwa'lu'ju', atsa' tyā'snai'cue nwēese'jsa yu'. <sup>3</sup>I'cue'shrráamée, cue'shva nyafīia' tyā'wērrarráatja'w fi'nzesa yu' jyucaysa, ewmée yaacynírrá's jyuca cytey yuuna. Tyāa pa'ga Dyus castigo seena'sa's jypa'gawa'jsatja'w yu' maava jyucaysa.

<sup>4</sup>Nava tyā'wē pcalpa'ga Dyus dyi'pte uuní na'wē yā'j ūsteva, Dyusa' cue'shtyi iiméj wala ew yūuc peeygājrra. <sup>5</sup>Tyāasac Cristo'sva ma'wēga uunijūva ityi vit, tyā'wēy cue'shtyiva ityi vit. Quíjte yujva seelpimeesarrava, Dyus peeygāapa'ga yuurráai'cue nwe'wenisa yuu. <sup>6</sup>Dyusa' Cristo'sva ma'wēga uunijūva ityi vit, tyā'wēy cue'shtyiva ityi

vitrac cielute Cristo yacj caycachi'j. 7 Nava cue'shtyi tyajy peeygãani tyacue seena' walasa's naa e'su' ãate caavya'ja'jya'c tyã'wẽ yũu cue'sh tyacue wala ãjmeecueteva, naasáa Cristo pa'ga yuurráa. 8 Tyãa pa'ga i'cue'sha' quĩjte yujva seelpimeesarrava, naasáa Dyus peeygãjrra nwe'wenisarráa i'cue, tyã'wẽ Cristo's ũusuj jyuca yaacypa'ga. Dyus nwe'weni's i'cue'sh cacueju ew yũuna fi'nzerra uymeei'cue, tyã'sa' Dyuscu pees peeygãjrra. 9 Dyus nwe'weni's cacueju ew yũuna fi'nzerra ya'jypa'ga'tsme' naa pa'ga maa yujva iwejch yaacywa'j ji'pjmeeta'. 10 Tyãa pa'gatey cue'sh u'se yu'ptje'jwa'ja's Dyus pjeu'jrra nviitnisatja'w, ewrráa yũuna Cristo Jesus jype'jni fi'nzewa'jsa. Tyã'wẽ yũuna fi'nzewa'ja's Dyusa' nyafiitey yu pjeu'jrra nviit, tyã'wẽ yuurráa yũuna fi'nzeczajn.

### Dyus tashte pa'jwa'ja's ji'pjuni

11 I'cue'sha' nyafii'a' ma'wẽsacue yu' tyã'sna miiyajcywe: i'cue'sha' judiu ji'jmeei'cue yu', atsa' judiuwe'sha' i'cue'shtyi's Dyus tyjitynimeesata' jĩnaty we'we'. 12 Sa' tyãa ensu' judiuwe'sh yacjmée fi'nzesa i'cue yu', Cristo's ũuste ji'pjmeesa. Sa' i'cue'sha' Dyus pu'chwa'ja'sva ji'pjmeesa i'cue yu'. Tyãa pa'ga i'cue bagachte yujva Dyus tashte pa'jwa'j yu'sa' ji'pjmeesa yu'. 13 Macue nyafii' yu' Dyus tashte pa'jwa'ja's ji'pjmeesarrava, ãchja' Cristo Jesusa's nwẽese'jya' utyaapa'ga, Dyus tashte pa'jwa'ja's uyi'cue, Cristo' i'cue'shtyi nwe'weya' cluuste uupa'ga. 14 Cristo' tyã'wẽ yũurrac judiuwe'sh judiu ji'jmeesaty ajtsena fi'nzeni's iviiterra e'nzsaty teech jwendrráa vitna pa'j. 15 Sa' Moises leya'sva caaptsu'ju'c, Cristo tashterrarráa utyaarra e'nzsa puuty yajtsemée cyteerraj ij fi'nzeczajn. 16 Cristo' cluuste uurrac e'nzsaty cyteerraj ij fi'nzewa'ja's vitra, Dyus yacj yuuwemeesa vit.

17 Cristo' quĩjrra' e'nzĩi Dyus yacj yuuwemée neeyũuwa'ja's pta'shcu, i'cue'sh Dyus tashte pa'jwa'ja's ji'pjmeesatyva pta'shcu, sa' judiuwe'sh Dyus tashte fi'nzesatyva pta'shcu. 18 Tyãa pa'ga ãchja' judiumtja'w yuu meerra' judiumeemtja'w yuu nava Dyus Espiritu's jypa'garra e'nzĩi Dyus tashte pa'jwa'ja's ji'ptja'w. 19 ãchja' i'cue'sha' nasa ecajuwe'sh mee'cue, Dyus luuch yacj cyteerraj utyaarra teech yattewe'shrráa i'cue yuuna pa'j jyucaysa tyãa na'wẽsarrarráa. 20 Tyã'wẽ cyteerraj utyaapa'ga ew jiyute yu' i'cue'sha' yat na'wẽsa i'cue: yata's nyafyte' cuet yacju ya'caachinda'ja', atsa' tyãa caachinda'jnisa yu' Jesucristo'. Tyã'wẽ yuuna mjĩiya' tacjsa' Dyusna selpisaawe'sh vite' Jesus jycaajnisawe'shtyi yu'. 21 Atsa' i'cue'sha' tyãawe'sh caachinda'jna tacjni cajcuete yata's ew pjeu'jna umna ul'jnisa'cue, teech yatrráa yuuna cãjrra Dyus yuurrá's selpiwa'jsa. 22 Tyãa pa'ga i'cue'sha' Jesucristo yacj utyaarra', Dyus tyjityjnisa maa yacjva cyteerraj utyasáa i'cue yuu, teech yatrráa yuuna, tyãa yatte Dyus ũswa'j yuuya'.

### Dyus yuwe's judiu ji'lmeety pta'shwa'jsa

**3** <sup>1</sup>Tyā'wē andya' Jesucristo caapiya'jni's pta'shpa'ga i'cue'sh judiu ji'lmeerrava Dyus yacj fi'nzewa'ja's ji'pju'pa'ga, preesu ūsrrava, Dyus yacj puuty we'we'tj. <sup>2</sup>I'cue'sha' jiiyā'jne'cue Dyusa' i'cue'shtyi peeygājrra andynac neewe'we i'cue'shtyi caapiya'cjan. <sup>3</sup>Sa' i'cue'sha' judiwe'sh yacj utyaawa'ja's quim yujva jiimeene'ta yu' tyā'snac Dyusa' andya's caajiyu'j. Atsa' tyā'sa' i'cue'shtyi nyafii pta'shna fi'tj walameecuē. <sup>4</sup>Tyā'sa' lēeyrra' jiyune'cue cue'sha' judiwe'sh yacj utyaaya' ājawa'ja'sne' Dyusa' Pablo's caajiyu'j sūjna. <sup>5</sup>Tyā'snac nyafii enteya' quim yujtyva caajiyu'jnimée ūsu', nava āchja' Jesus jycaajnisawe'sh vite' Dyusna selpisaawe'shtyi Dyusa' caajiyu'cj tyajy Espiritu caaūsutje'tje. <sup>6</sup>Tyā' na'wē': Macue judiu ji'lmeerrava Cristo nwe'weni's nwēese'pja'ga yuuráa e'nzī cyteerraj utyaarra teechrráa yuuna pa'jrra, judiwe'sh yacj ja'nda Dyus tashte ūswa'ja's ji'pjuty, sa' Dyus ūsni Cristo ji's írráa jyuca jypa'gawa'jsata'. Tyā'wēc caajiyu'j.

<sup>7</sup>Tyā'wē yūuni's pta'shwa'jsac Dyusa' andya's nvijt, tyacue wala ājmeeccuesateva tyāafii andya's pu'chrra. <sup>8</sup>Andya' Dyus yacj fi'nzesa maateva jytjaacue ājmeeccuesatj. Nava Dyusa' andya'scu nvijt, Cristo nwe'wenisa yuuráa quijteva tjaacue ewsa' tyā'sna judiu ji'ljmée vite nasaty pta'shcajn. <sup>9</sup>Tyā'wē quijnava jyuca pjeu'jsa Dyusa' judiu ji'lmeetyva nwe'werra judiwe'sh yacj cyteerraj yuutyaya' ājawa'ja's tyāniiteycu pjeu'jrra ji'pju' quim yujtyva caajiyu'jnimée tyā'sna āate pta'shwa'jsatj nviitni yuu maatyva jyucaysaty. <sup>10</sup>Dyusa' ma'wē yūurra nasa ma'wēsatyva jyuca nwe'werra cyteerraj teechrráa vítna pa'jni's caajiyu'jnic yuu, atsa' Dyus tyā'wē yūuni's āchja' Dyus yacj fi'nzesawe'sha', ēe walatewe'sh, angeles ma'wēsava jyuca jiyutyna. <sup>11</sup>Dyusa' tyā'wēne' nasaty nwe'wewa'ja's tyāniitey pjeu'jrra ji'pju' naa quiwe meetey tyā'sa' cytey yuuc, Jesucristo's naa quiwete caajrra. <sup>12</sup>Tyā'wē Cristo nwe'wepa'ga āchja' Dyus tashte ūucjmée pa'jya' ājatja'w, tyā'wē ūucjmée utyaawa'ja's Cristo íic caaūsutje'je' naa pa'ga. <sup>13</sup>Tyāa pa'ga andy i'cue'sh pa'gate pytjaa yuuni's űusna yajcymée, wejyva Dyusa'srráa wechana meswe.

### Cristo peeygāani iiměj seena' walasa

<sup>14</sup>Tyā'wē Jesucristo Tata' nwe'wewa'ja's pjeu'jrra cytey yuupa'gatj andya' tyā'sa' peejyūcuerra wechana neewe'we', <sup>15</sup>tyā'sa' maava jyucaty Tata jīna cysusu' Dyus luuch naa quiwetewe'sh ma'ty yuu, cielutewe'sh ma'ty yuu nava jyucaysa. <sup>16</sup>Atsa' andya' Tata's pēyi'tj, Dyus Espiritu i'cue'shtyi pu'chna quijte yujva peejymée chjāchja caafi'nze'cjan, <sup>17</sup>cyaj i'cue'sh ūusuj jyuca yajcyte', Cristo' i'cue'sh ūuste nes yuuna. Tyā'wē yūute', i'cue'sha' jypumbamée peeygāawa'jrrá's wala ji'pjurra <sup>18</sup>Dyus

luuch jyucaysa jiyuya' ājane'cue, Cristo peeygājrra nwe'wenisa iiméj seena' walasa'sva. <sup>19</sup>Tyāa peeygāani' iiméj seena' walasa' atsa' ¿quimrra' jiyuya' ājama'ty? Tyā'wēteva i'cue'sh jiyucajn Dyusa's pēy'i'tj, cyaj Dyusa's ūusuj jyuca jiyurra tyāa yacj yuurraa fi'nzene'cue.

<sup>20</sup>Dyusa's seena' yuj wala wechaawa'ja'. Tyā' quījteva jyuca pu'chya' ājawa'jsa', cue'sh macue pējyteva tyāate jytjaacue wala bagachteva pu'chna nes yuuwa'jsa'. <sup>21</sup>Tyāa pa'ga Cristo nwe'wenisa yā'j yu', Dyusa's bagachteva wechana nes yuuwa'ja' Cristo nwe'wepa'ga.

### Dyus Espiritu' ma'wēsatyva cyteerraj yuutyani

**4** <sup>1</sup>Cristo's selpiipa'ga andya' preesu ūstju, nava i'cue'shtyi neewe'we'tj: ma'wē fi'nzecajn ne' Dyusa' i'cue'shtyi tyjityj tyā'sa' cytey yuuna meswe. <sup>2</sup>Dyus yacj fi'nzesayā'ja' maa yujva iiwejch yajcymée wejyva puuty ya'peeygājna ewrrāa yūuna mfi'nzewe. <sup>3</sup>I'cue'sha' puuty ūuscha yajcyna fi'nzemée, wejyva cyteerraj tyutemée fi'nzewa'jrrā's mpa'pchuwe, Dyus Espiritu' cyteerraj yuutya yā'cj naa pa'ga. <sup>4</sup>Tyāasa Cristo nwe'wenisa yā'j yu', ma'wēsarrava cyteerraj teechrrāac yuuna pa'ja', sa' cyanzīi Dyus Espiritu' teechsarrā'styi jyucaysa jypa'ga', sa' cyanzīi teech ajte Dyus tashterrarrāa pa'jwa'ja'scu ya'ūytjasu', <sup>5</sup>tyāa pa'gatey jyucaysaty nwe'wesa' teechrrā', atsa' tyā'srrāanac jyucaysa ya'nwēese'je'. Sa' jyucaysa tyā'srrarrāanac yajcyna bautismo's ya'jypa'ga'. <sup>6</sup>Sa' teech Dyusrrāa ūsa' jyucaysate Tata tyā' maateva puutejca walasa' jyucaysaty jycaajsa, sa' jyucaysa yacj ūsa'.

<sup>7</sup>Sa' teechrrāa vitna pa'jrrava, Dyusna selpiiya' ājawa'j yu'sa' fiyfiyrrajc Cristo' ūs teehsa na'wērraj. <sup>8</sup>Tyā'wē yūuwa'ja's we'werrac Dyus libroute na'jīna fi'jni yuu:

Ewmeesa cusejū nwe'werra cielun pe'jna u'cj,

Sa' naa quiwete nasatyis ājawa'ja's ūscu jī'c.

<sup>9</sup>¿Ma'wērraga tyā'wē cielute tejcac jīna we'wé'? Cristo' nyafyte' uusaawe'sh ūsnite cjuē'y cjēerra tyāajūc qui' cielute tejca jīrrac tyā'jī'. <sup>10</sup>Tyā'wē uusaawe'sh ūsnite cjuē'y cjēesa írrāac cielute iiméj ēe walate cājpcach tejca, mteeva tyāarrarrāa jyuca tjengna ūsya' ājaya'. <sup>11</sup>Tyā'wē yūurrac Dyusna selpiiya' fiyfiyrraj ājawa'ja's ūs jyucaysaty teehsa na'wērraj: maalītyi's tyajy yuwe's nyafyte pta'shwa'jsac nvijit; vitetyi's Dyus ma'wē yūuya'vateva dyiicjēy pta'shwa'jsac nvijit; vitetyi's Dyus yuwe pta'shwa'jsac nvijit; vitetyi's Dyus yuwe's caapiya'jna jype'jwa'jsac nvijit. <sup>12</sup>Tyajy nasatyi' tyā'wēc mjīiwa'jsa pjeu'jrra nvijit, tyā'wē Cristo nwe'wenisa yuutyi' jweeírrāa cyteerraj chjāchja fi'nzewa'ja's caapiya'cjancu tyā'wē yūu. <sup>13</sup>Cyaj jyucaysa Dyus Nchi'ca'srrarrāa nwēese'jrra tyā'sa' ew jiyuna jyā'jrra quījte yujva jypumbamée ew fi'nzecajncu tyā'wē caapiya'jrra nvijit. <sup>14</sup>Tyajū yūurra' luuch na'wē yuume'nja'w. Tyā'wēme' nasa ewmée yajcyrra īshiina pta'shnite tjēyméc

wetena pa'jrra cyte jypumbana ya'fi'nze! <sup>15</sup>Tyã'wě jypumbamée, wejyva isasarrá's we'wena peeygãawa'j yuurrá's yajcyrra Cristo yacj jweeírráa chjächja fi'nzena u'jwa'j ji'ptja'w. <sup>16</sup>Atsa' maava Cristo tashte utyaarra jyucaysa cyteerraj pcaacjerra puuty ya'caapiya'jna ew yūuna fi'nzete!, tjěyméc peeygãjna fi'nzewa'ja' walaana u'jue'.

### Ewmée yaacyni's jyuca yu'ptjejni

<sup>17</sup>Tyã'wě! atsa' cyajtj i'cue'shtyi neewe'we', vite nasa Dyusna jiimeesa na'wě fi'nzewe'shte. Tyãawe'sha' peecy ūus yaacyni seelpiwa'jmeesarrá'styi cytey yuuna fi'nze!. <sup>18</sup>Tyã'wě Dyusa's jypa'gaya' wa'lpa'ga Dyus yacjmée ūsra ew eena' yaacywa'j yu'sa' ji'pjmeeta!. <sup>19</sup>Tyãasaty tyãawe'sha' tjaame ūus yu'sa' ji'pjmeé, pcal seena' canzhsaterráa fi'nze!. <sup>20</sup>Nava i'cue'shtyi' Cristo' tyã'wě fi'nze caajme!. <sup>21</sup>Tyã'sa' i'cue'sha' peecy jiine'cue Jesus caapiya'jni isasa's wěse'jsa dyijrra', <sup>22</sup>nyaffi ūus yaacyni ewmeeterráa caafi'nze'jsa's nwěese'jmée jyuca nvijtrra, <sup>23</sup>ew ūus yaacywa'ja's caapiya'jni yacj mpju'se'jwe. <sup>24</sup>Cyaj i'cue'sh ūuste ewsa yuurráa yu'ptjejni yuute!, Dyus ma'wěne' jytjáasu' tyãa yuurráana áate caavya'ja'jna fi'nzene'cue, Dyus dyi'pte quíj pcal yujva ji'pjmeé.

<sup>25</sup>Tyãasa áchja' peena yu' íshiina fi'nzemée, wejyva teeche na'wěrraj isasarrá's mwe'wewe maa yacjva, tyãa pa'gatey jyucaysa cyteerraj teech jwendrráa yuuna pa'jsatja'w tyãa ji'jrrarráatewe'sh.

<sup>26</sup>Mpa'yajcywe, ūuschani yacjrráa yu' fi'nzewa'jme!, ewmeete weteya'mée. Tyãa entey ya'mpeltunaíwe. <sup>27</sup>Echtjě'ja's wej yujva ca'ga'jnuwe.

<sup>28</sup>Pesweesava Dyusna jiyunijüyá'ja', pesweewa'jme!, wejyva pesweemée cuseju mjíirra vite peejiina fi'nzesatyva pu'chna fi'nzewa'ja'.

<sup>29</sup>Sa' canzh we'wenisa yu' teech yuwerráa yujva i'cue'sh yuweju casejwa'jsame!, wejyva Dyus yacj fi'nzewa'j selpiwa'jsarrá's we'wewa'ja', cyaj vitesava Dyus yacj fi'nzewa'jrrá's piyaatyna. <sup>30</sup>Sa' Dyus Espiritu'sva cyūusu'jnuwe, tyãa pa'gatey Dyus Espiritu írráac i'cue'shtyi's Dyus jii vitna pa'jrra nvijt, Dyus tashna u'jwa'j en ájtewe'sh.

<sup>31</sup>Sa' ewmée yajcyna, ajtsena, pyūuscue yuute juuna' we'wena, ūusachana ma'wěwa wěeshuna fi'nzenijū jyuca mtyuteewe. <sup>32</sup>Wejyva puuty ewrráa yūuna, teeche na'wěrraj puuty peeygãjna, puuty ya'peltunāyna mfi'nzewe, Cristo cue'shtyi nwe'wete Dyusva ma'wěga cue'shtyi peltunāy tyã'wěy.

### Dyus luuchyá'ja' tyãa na'wěy fi'nzeni

**5** <sup>1</sup>I'cue'sha' Dyus luuch yá'ji'cue na' tyãa na'wěy fi'nzeya' mpa'pchuwe. <sup>2</sup>Puuty ya'peeygãjna mfi'nzewe, tyã'wě yūucajnírráac Cristova cue'shtyi peeygãjrra Dyus dyi'pte peequí ya'ducjrra piishacuē na'wě icjni yuu.

<sup>3</sup>Tyāa pa'ga i'cue'sha' Dyus jiiyā'jrra', ptamsa ma'ty yuu meerra' ptamsamée ma'ty yuu nava canzh yuuna fi'nzeni's jyuca nvijtrra ūusterrāa yujva yaacywa'l' jii'pjmeei'cue. Sa' Dyus yu's yajcymée jii'pju wēenirrá's yaacywa'l' jii'pjmeei'cue. Quíjva canzhsa yu'sa' cysuswa'jrrāa yujva jii'pjmeei'cue. <sup>4</sup>Tjaampa' yūuni quíj yujva seelpimeesa yu'sa' tyā'wē we'wena fi'nzewa'jme', wejyva Dyusa'srrāa wechana fi'nzewa'ja'. <sup>5</sup>I'cue'sha' jii yā'ji'cue: Dyus yu'sa' yajcymée jii'pju wēenirrá's yajcyna fi'nzesa (tyā'wē jii'pju wēenirrá's yajcyte', tyā'srrānac dyus na'wē yaacywa'l' caseje'), canzh pcal yūuna fi'nzesa, quíjva canzhsarrá's cytey yuuna fi'nzesa, tyā'wē yūusa' Dyus Cristo yacj jycaajna ūsnite u'caya' ājameetyna. <sup>6</sup>Tyāa pa'ga tyā'wē pcal canzhstate fi'nzewa'ja's caapiya'jni's mpa'yajcywe. Tyā'wēme' tyāa pa'gaírrāa Dyus castigo seena'sa yuja' Dyus jycaajni's nwēese'jmée fi'nzesawe'sh jii. <sup>7</sup>Tyāawe'sh yacj ja'nda ewmée yūuna fi'nzenuwe.

<sup>8</sup>Nyafiai' i'cue'sha' jypumbana ūsrra', chji'ndyte na'wēi'cue fi'nzesa yu'. Nava āchja' Cristo's ūuste jypa'ganijū' eena'te ūsi'cue. Tyāa pa'ga peena yu' jypumbamée eena'terrāa mfi'nzewe Cristo nwe'wenijūyā'ja'. <sup>9</sup>Eena'te fi'nzetsrra', puuty peeygājna isasarrá's we'wena fi'nzewa'ja', Dyus dyi'pte jypumbamée. <sup>10</sup>Naasāa Cristo jytjāasnirrá's cytey yuuya' mpa'pchuwe. <sup>11</sup>Jypumbana chji'ndyte ūssa yacj ja'nda ewmée yūuna fi'nzenuwe, wejy yuuva tyā'wē yūusatyi' mcaapiya'jwe ewmée yūucajmen. <sup>12</sup>Tyā'wēme', paatste tyāawe'sh ewmée yūuna fi'nzeni's āate we'wewēete tjaame yuja'. <sup>13</sup>Nava tyāawe'sh ewmée canzh yūuna fi'nzeni's tjaamemée āate we'wewa'ja', cyaj quíj yujva paatstemée jyuca āaterrarrāa caavya'ja'jni yuuna. <sup>14</sup>Tyā'sna we'werrac na'ji':

Jypa'yacymeeng fi'nze', miiyajcy.

Sa' pcalte uuní na'wē fi'nzenijū mcaasej,

Atsa' Cristo' eena'te caafi'nze'jena jii'c.

<sup>15</sup>Tyāa pa'ga wala jypa'yajcy fi'nzewa'jrrá's dund mpa'pchuwe, jiiimeesa na'wē jypa'yajcymée yu' fi'nzenuwe. <sup>16</sup>Tyā'wēme' naa ensu' ūuswa'l' enrāa casejetsa', naa pa'ga en ewsatyi' iviitunuwe. <sup>17</sup>I'cue'sha' jypa'yajcymée yu' fi'nzemée, ewsa's jiyuwa'ja's mpa'pchuwe, Cristo jytjāasnirrá's ew jiyuuya'. <sup>18</sup>Tyāasa tūuna fi'nzenuwe. Tyā'wēme', tūunisa' vituwa'tje pe'jna u'jsa'. Atsa' tyā'wē yūumée wejyva Dyus Espiriturrá's ūuste jyuca jypa'garra, <sup>19</sup>i'cue'sh pwe'sh jyucaysa Dyusa'srrāa ūusuj jyuca yajcyna wechana memna meswe. <sup>20</sup>Macue wala tjēysa vyaateva, tyāatyi's ūusmée bagachteva Dyusrrāana wechana meswe, Jesucristo's pi'cyrra.

### Jyucaysa puuty ya'nwēese'jna fi'nzeni

<sup>21</sup>Āchja' i'cue'sh pwe'sh jyucaysa puuty ya'nwēese'jna mfi'nzewe, Dyusa's yajcyna. <sup>22</sup>Nyuua' nmi'a's nwēese'jwa'l' jii'pja', Cristo' tyā'wēc jycaaja' naa pa'ga. <sup>23</sup>Tyāa pa'gatey nmi' tyā'wē nyuua's tjengna jype'jwa'jsa', Cristova ma'wēga tyajy nwe'wenisatyi's tjengna jype'je'

tyā'wēy. Atsa' Cristo' i'neerráa tjengna jype'jmée, vitucajmen nwe'wesa'.  
 24 Atsa' Cristo nwe'wenisava ma'wēta Cristo's nwēese'je', tyā'wēy  
 nyuuwe'shva nwēese'jwa'j ji'pjta' tyāawe'sh nmi'ty quíjteva jyuca.

25 Āchja' nmi'a' nyuua's peeygāawa'j ji'pja', Cristova ma'wēga  
 tyajy nwe'wenisaty peeygájrra tyāawe'sh pa'gate cluuste uu tyā'wēy.  
 26 Cristo' tyā'wēc yuu tyajy nwe'wenisa nasaty quíj pcal yujva ji'pjmée  
 jyuca yaatena pa'jrra, 27 tyajy tashte iiméj zhichcue pjeu'jni tyāa  
 yuurrá's selpiwa'jsa vit-ya'c tyā'wē yūu. 28 Nmi'a' tyā'wē peecy nyuua's  
 peeygāawa'j ji'pja' peecy cacue'sva ma'wēga ya'peeygāja' tyā'wēy, tyāa  
 pa'gatey nyuua' peecy cacue'írrá' naa pa'ga. 29 Quim yujva peecy cacue's  
 atse'tsme', wejyva wala ew jypa'yaqui'c. Atsa' Cristova tyā'wēy yu tyajy  
 nasaty' wala ew jypa'yacyna jype'je'. 30 Tyāa pa'gatey tyāa jii yā'tja'w,  
 tyajy tashte tyuteeya'mée utyasáa. 31 Tyā'wēy yu ya'yu', ptamusava peecy  
 neywe'shtyi nvijtrra nyuu yuuwa'jsa yacj ya'utya'c tyuteeya'mée, atsa'  
 e'nzrrava teechrráac yuuna pa'ja'. 32 Ptamuurra fi'nzenisa' Cristo tyajy  
 nwe'wenisa cyteerraj utyaarra teechrráa yuuna pa'jwa'ja's caajiyul'nisa',  
 atsa' tyā'wē teechrráa yuuna pa'jwa'ja's quim yujva jiimeety yu' tyā'snatj  
 pta'shi'. 33 Atsa' ptamsayā'ja', teehsa na'wērraj peecy nyuuty peeygájna  
 fi'nzewa'ja', i'cue'sh cacueti ma'wēcue peeygāja' tyā'wēy. Atsa' nyuua'  
 peecy nmi'a's nwēese'jna fi'nzewa'ja'.

**6** 1 Cristo's jiiyā'jsa' luuchwe'sh i'cue'sh neywe'shtyi nwēese'jna  
 mfi'nzewe, Cristo' tyā'wēc jycaaja' naa pa'ga. 2 Tyā'wē cytey  
 nwēese'jsaty'i's Dyusa' wala tyach caafi'nze'jya' neeyūuc tyā'sa' Moises  
 leyte na'jīna pta'shna fi'jrra nviitni ūsa': Peecy neywe'shtyi nwēese'jrra',  
 3 wala ew fi'nzene'nga naa quiwete wala tyach jī'c.

4 Neywe'shva i'cue'sh luuchtyi zhichcue ewrráa miipe'jwe, Cristo's  
 jiyuwa'ja'srráa caapiya'jna.

5 Selpisaawe'shva naa quiwete i'cue'sh patronwe'shtyi wa'lmée  
 mwēese'jwe, Cristo yu's nwēese'je'ts na'wē yajcyna. 6 Patronwe'sh  
 tjengna ūsterráa tyā'wē cytey yuuwa'jme', wejyva Cristo's nwēese'je'ts  
 na'wē yajcyna cytey yuuwa'ja', ūuste wechana. 7 I'cue'sh mjīia's wa'l  
 yajcymée Cristo's selpiitstju sūjna ew mjīiwa'ja', nasaty selpiitstju  
 sūjmée. 8 I'cue'sha' jiiyā'ji'cue patron ji'pjsa ma'c yuu patron ji'pjmeesa  
 ma'c yuu nava tyā'wē yūusatyi' Dyus dewewa'jsa' teehsa na'wērraj  
 ma'wē mjīisateva. 9 Patronwe'shva i'cue'shtyi selpisaaty juuna' yūumée  
 miipe'jwe, tyāa pa'gatey jii i'cue selpisaawe'sh vite' patronwe'shva  
 jyucaysa Cristo cielute ūssa teech yuurráana nwēese'jsai'cue. Tyāa  
 pa'gatey Cristo dyi'pte' maa yujva tjaacue walasa meeta'.

#### Ewmeesa's deewewa'ja's jypa'gani

10 Āchja', yacjtjē'jwe'sh, chjāchja mfi'nzewe Cristo yacj tyutemée,  
 atsa' tyā' pu'chna nes yuuna bagachteva cchjāachja'jna. 11 Tyāa pa'gatey



ewmeesa yacj puiiwa'ja's Dyusa' jyuca ũscu, atsa' tyāa yacj puiirra', echtjē'j ewmée yūunite wetemeene'cue. <sup>12</sup>Tyā'wēme', naa quiwete nasaa pwe'sh yacj puina ũsmeetja'w. Naa quiwete echtjē'j ma'wē seena' ewmée canzh tyāarrarrāa jycaajna ũsna tyāa yacj cue'sha' pdyi'purra puina ũstja'w. <sup>13</sup>Tyāa pa'ga ewmeesa yacj puiiwa'j Dyus ũsni's jyuca mpa'gawe, ewmeesa yacj pdyi'purra ũucjmée chjāchja deeweya'. Tyā'wē yūurra', ewmeesa ma'wēsa'sva i'cue'sh yuj cnayuune'cue. <sup>14</sup>Tyāasa āchja' ũucjmée chjāchja meswe, Dyus yuwe isasarrá's ũuste ew yu'acjrra cytey nwēese'ljna. Ew yūuwa'j yuurrá's ũuste jyuca mji'pjuwe. <sup>15</sup>Sa' Dyus yuwe ewte nviitwa'jsa's mteeva pta'shya' u'jya'rrāa meswe. <sup>16</sup>Atsa' Dyusa' quijteva jyuca pu'chjina sūjwa'j yuurrá'sa' wej yujva pechcananuwe. Tyā'wē yaacyni yacja' echtjē'j macue seena' yuutsteva, jyuca cnayuune'cue.

<sup>17</sup>Dyus nwe'wenijūyā'ja' tyāajū wej yujva tyutenuwe, sa' Dyus Espiritu caapiya'ljni Dyus yuwe'sva wej yujva pechcananuwe. <sup>18</sup>Tyā'wērrāa yūumée, Dyus Espiritu's pi'cyrra Dyus yacj yuurrāa bagachteva puuty we'wena meswe, chjāchja fi'nzewa'ja's pējyna. Sa' Dyus yacj puuty we'wewa'ja's bagachte yujva pechcanamée meswe, Dyus luuch jyucaysa pa'gateva Dyusa's mneewe'wewe. <sup>19</sup>Sa' andy pa'gateva Dyusa's neewe'wena meswe, cyaj Cristo's ma'wē ũuste jypa'gawa'ja's quim yujva jiyunimeesa's shiingmée pta'shya' ājacajn. <sup>20</sup>Tyā'sna pta'shwa'ljsa írrāac Dyusa' andya's nvijt, atsa' tyāa pa'ga írrāa āchja' preesu ũstju. Atsa' i'cue'sha' Dyusa's neewe'wena meswe, tyajy yuwe's ũucjmée pta'shcajn.

### Yuwe wechaa caajni

<sup>21-22</sup>Cue'sh yacjtjē'j Tíquico bagachteva Dyus yacj tyutemée pta'sh pu'chsa tyā'sa' cajatstju, andy ma'wēne'tca fi'nze' tyā'sa' jyuca pta'shcajn. Atsa' andy ma'wē fi'nzena quijrraj yūuna ũsteva jiyurra', i'cue'sh maafí yu' ũsna ũsrrava chjāchja yaaquine'cue.

<sup>23</sup>Dyus cue'sh Tata vite' cue'shtyi nwe'wesa Jesucristo tyāawe'sha' i'cue'shtyi pu'chjityna, quijteva ewrrāa puuty ya'peeygājna Dyusa's yuurrāa yajcyna fi'nzecajn. <sup>24</sup>Sa' maava cue'shtyi nwe'wesa Jesucristo's yaacysa yuutyi's Dyusa' pu'chjina jyucaysaty.